

Il studi da rumantsch a l'uni da Friburg è salvà

Professor Georges Darms è stà la persunificaziun dal studi da rumantsch a l'Universitad da Friburg. Ed ussa sent'ins cun sia pensiun las consequenzas en la perscrutaziun e la furmaziun universitara rumantscha – e quai a l'Universitad da Friburg sco er sin il stgalim universitar da l'entira Svizra. Segir è però al mument: er en il futur pon ins studegiar rumantsch a l'Universitad da Friburg.

Durant 20 onns è Georges Darms sa deditgà cun chau ed olma a la furmaziun ed a la perscrutaziun dal rumantsch a l'Universitad da Friburg ed ha mantegnì cun ses engaschament l'unic Master da rumantsch sco rom principal en l'entira Svizra. Ses pensiunament n'ha pia betg mo consequenzas sin il studi da rumantsch a l'Universitad a Friburg, ma pertutga l'entir stgalim universitar en Svizra. Cun la collavuraziun cun la Scola auta da pedagogia dal Grischun han ins ussa chattà ina soluziun che cuntenta a tuts.

Futur segirà

La professura rumantscha vegn ad esser occupada cun in nov professor per il semester d'atun 2013. Quella piazza vegn scritta ora l'atun 2012. Durant l'interregnum è la cuntinuaziun da l'instrucziun en rumantsch garantida: dr. Matthias Grünert vegn a surpigliar il remplazzament per in onn. El vegn a tegnair las prelecziuns ed ils seminaris en linguistica rumantscha durant il semester d'atun 2012 e durant il semester da primavaira 2013. Uschia èsi garanti ch'ils students da rumantsch possian cuntinuar cun lur studi senza in'interrupziun ed era che novs students possian s'annunziar per il rom rumantsch. En pli porscha l'universitad er en l'avegnir ils curs da lingua en rumantsch grischun per students d'autras linguas. Ils seminaris en litteratura rumantscha vegnan instruids vinavant dal professor envidà Clà Riatsch.

A partir dal semester d'atun 2012 pon ins studegiar il Bachelor ed il Master en rumantsch a l'Universitad da Friburg mo pli sco in rom lateral. Las furmaziuns da magister secundar e da magister gimnasial vegnan offridas era vinavant. Actualmain vegn discutà, sch'i dat ina pussaivladad da porscher en il futur in nov studi da rumantsch sco rom principal en furma dad in Master cuminaivel tranter las universitads da Friburg e da Turitg.

Contact: Barbla Etter, assistenta diplomada: barbla.etter@unifr.ch, tel. 026 305 62 86

Infurmaziuns: <http://lettres.unifr.ch/fr/langues-litteratures/plurilinguisme-et-didactique-des-langues-etrangeres/reto.html>